

Sòpi

Nikki Haley, embahador di NU (Nashonnan Uní) di Merka, a sorprendé amigu i enemigu un siman pasá dor di deklará ku mester skucha tur hende muhé ku ta sinti nan mes violá dor di Donald Trump. Esaki ta un akshon balente di un persona nombrá pa Donald Trump.

Ultimo lunanan #MeToo a denunsiá e kondukta repudiabel di un kantidat di hòmbler (spesialmente hòmblernan di mas edat i ku éksito). Na gran kantidat a retirá nan i kita nan for di nan funshon. Dikon esaki no ta sosodé ku, loke semper nan ta bisa, 'e hòmbler di mas poderoso na mundu'? E ta 'grabs them by the pussy' segun su mes palabranan. E ta registrá riba video. No ta hasi niun diferensia. Ata awor e ta pretendé ku no tabata su stèm. I nos lidernan di gobernashon ta keda rímula kuné.

Integridat ta para òf kai ku verasidat. Un direktor ku intensionalmente no ta papia bèrdat ku su hunta di komisario, por haña su retiro inmediateamente. Kon ta pará ku presidente di e pais mas poderoso na mundu? Tin sentido bon mirá pa papia tokante integridat riba nivel empresarial i organisashonal, si riba nivel tòp mes esaki no ta eksistí?

Tanten ku nos ta sigui midí ku dos òf mas midí, nos lo no yega niun kaminda ku promoshon di integridat den mundu empresarial i nos komunidad. Mayoría hende ta konvensí ku e aktual presidente merikano no ta íntegro. Tòg e ta konta ku sosten. Ta trata akí di solamente poder? Predominio ekonómiko? Echo ta ku kondukta inétiko di lidernan di nos planeta, ta bèrgonsá tur intento pa mehorá étika i integridat riba otro nivel.

Piò ainda ta e echo ku ta trata akí di panelnan den moveshon. Loke dos aña pasá tabata straña nos den notisia mundial, no ta straña nos mas awendia. Eksprehonnan ku nos tabata haña inaseptablemente brutu dos aña pasá, nos ta aseptá awor pasó nos a tende nan shen biaha kaba. Nos ta aseptá nan numa tur desesperá. Tur kos ta un kustumber. Esaki ta resultado di ehèmpelnan robes.

Esaki ta un desaroyo super peligroso. Si mil biaha bo tende i lesa ku musulmannan ta terorista, ku tur mehikano ta gationeran ilegal i ku China ta destruí bo pais, e ora ei ta kada bes un stap mas serka e gana di lansa bo bòm atómiko aki aya. Mi generashon a mama esaki ku lechi di mama i esaki ta dunabo masha miedu di tipo di sintimentunan asina. E sintimentunan akí a resultá entre otro den matamentu di miones di hudiu. Siudadanonan korekto manera ami ku bo e tempu no tabata sa. . . 'nicht gewusst'. Ya ya. Esaki ta bolbe sosodé awor. Nos sa awor òf nos no ke sa?

Corporate governance ta bai tokante integridat. Integridat den mundu empresarial ta un manteka ku ta dirti den un sòpi kayente ora e tòp polítiko i atministrativo den un komunidad no ta komportá su mes di forma íntegro. Ke men den sala di direktiva tambe e tópiko trabaoso akí mester ta prominentemente riba agènda. No solamente e integridat interno, pero tambe esun di e ambiente kaminda e empresa ta funshoná. Kada empresa ta sinti, pero ta tambe ko-responsabel pa e efektonan di e sistema polítiko i públiko den e pais kaminda e ta funshoná. Niun hende no por bira lomba pa esaki. Papia tokante integridat di bo propio organisashon por solamente si bo wak integridat di e komunidad kaminda bo ta funshoná komo empresa. Integridat no ta un balor fiho, pero un produkto di un reflekshon i akshon kontinu. E ta meskos ku kushiná. Tur ingrediente tin nan propio influensia i ta determiná e totalidat huntu kada bes. Kada ingrediente ku bo agregá ta hasi e sòpi otro. I bo no por saka niun ingrediente afó. Nos tur ta finalmente responsabel pa loke ta bai den e sòpi ei i pues tambe si e dañá.
